









荆釵裙布裁雲鏤月之流人可

二百輩詩近數千首既廣擇而

嚴取之就其中予所心折則姑

孰鄒賽貞遂寧楊安人西陵董

少玉海寧朱靜庵吾桐方清芬

五人而已此外雖負盛名如雲

卧閣之陸氏絡緯吟之徐媛皆

斤斤焉不少假借嗚呼予豈刻



視筭帷哉蓋上世風氣醇樸嬾  
人女子之能言大率自鳴其志  
託類切物時造精微師氏采之  
仲尼筆以為經正變泚慝咸足  
爲世勸戒而莫或疑之彼無好  
名緣飾之意故詞真而義永也  
自采風不行漢唐以來宮闈麗  
句多好事者託爲之即蔡琰十



八拍已入唐音真贗俱未可問  
至近代香奩襲取浮譽偶能執  
筆竟引宣文女學士相誇良由  
身隱曲房無揮塵碎琴之可共  
見扈芳掇採任意稱工卓犖詞  
宗反難自別于儕輩于是識者  
起而論斷之本之賡酬以著其  
敏叅之格澤以觀其變質之四



庫以驗其通廣之能事以徵其  
緒必使一出于寔學而後房中  
之奏得登大雅此予之亟取乎  
五人也廼今又得一人焉則冰  
僊吳夫人是夫人延陵華胄年  
十七歸高陽許氏相我蘭陵憶  
予弱冠讀書虎丘楊維斗諸君  
口其鄉之閨秀必首夫人謂夫



人婉慧絕倫，幼研經史詩文書  
畫不教而能，音律琴棋動詣殊  
妙。予蓋心儀爲好才子也。及壬  
辰，通籍獲于師門，兄事蘭陵將  
盡請夫人製作觀之，而未暇已。  
亥，井上病止，武安始徙二千石。  
署中讀嘯雪菴集於戲，惟其蓄  
之深，則囊括百家，地埴諸體而



神理悉具杼之博則森羅萬象  
氣脩四時而非一善之可名是  
寧區區才子足以盡夫人乎彼  
五人者或與予生不同時但挹  
篇章景其芬馥或幸同時同里  
而年齒先後無由即其盛壯之  
滌思今夫人身處重幄予恃蘭  
陵雁行得以純素陟釐時焉餘



潘隨題屬詠脫腕迅飛花鳥烟  
雲圖寫盡態即下走關山之曲  
進奉平章多有賴其追琢者則  
予之信五人又未若信米仙之  
爲尤至也既全錄其稿擬取少  
作選入明詩顧念蘭陵柄用方  
始行叅大政潤色昇平興朝郊  
廟樂章必由手定夫人誼繫唱



隨亦應譜安世之歌被諸管絃  
如唐山夫人者名載義熙例有  
弗合然讀乙酉以後諸什大都  
畔牢結轡引中清商寄志神仙  
嘲譏幻夢度夫人靜觀世變固  
有不得其平者紮濛蘓幕之戲  
何足煩鼓瑟湘靈之手舉以冠  
三百載閨媛未必非夫人之所



許也夫由吾說以行則好名緣  
飾者寃難逃有識之鑒而繼國  
風呂自鳴其志必好學深思如  
六夫人而後可也然豈獨為宮

閨勸哉

皆

順治己亥孟冬滌岑道民陳焯  
書于洛水麗秋軒





序

遜抗機雲而後才不鍾於男子而

鍾于嬪人快辭也亦偏辭也夫女

子有才不能唱和並諧頽頽鳳羽

俛獨抱此明月愧彼藁砧易安泚



真因不足道謝道韞之情亦苦矣

哉若靈藥悔偷青天碧海雖筆擅

七襄何足以云予年友許蘭陵吳

門閼閼撥土第分符千里其治邁

龍黃多以嘯詠出之昔人謂謝安

為江左風流宰相今茲河朔又有

風流太守則予蘭陵近是蘭陵配

吳夫人以崔靈王謝之高標具瓊

英梁董之儂骨來乘蕭史婢視文

姬內助之暇侍玉宸檢丹經琉璃



研匣翡翠筆牀時吐異香其點畫  
之妍銀鈎玲動其丹青之妙絹素  
欲鳴遙山遠水秋蟲春鳥以至露  
浥繁紅霜寒枯木不澆描濃抹  
一倩不聿為青鳥見者輒驚於麥  
玩不置賞鑒家題以為無韻詩而  
夫人更自有詩在焉予聞古良媛  
篇什蓋亦多矣班姬揚其徽左芬  
望其調明月夜珠之得雋珍珠一  
斛之寐寥玉臺新咏香奩集之類



莫不幽怨清新終帶薌澤以言乎  
玉峰之約則未也若其豔麗而兼  
山林閑靜而含悲壯身在閨闈而  
寄情蓉澗韻標林下而曠懷天地  
吳夫人真堪獨步一時矣昔蘼蕙  
有織錦迴文吳夫人之錦不在鍼  
神而在筆妙求之房幃之秀三百  
篇其合璧也咏絮謝公之前窈窕  
之芳也携手西秦之路卷耳之懷  
也渚姬凌前星昂無洞樛木之仁



也退食茗香文房賞咏翻簧之樂  
也予過漳川一日太守出嘯雪庵  
詩示予曰昔文與可夫嬪得子瞻  
一詩而傳趙王孫管夫人則軒

震舉不資人譽予不及王孫夫人

而願學與可子其有以弁之乎謂  
張敞媿眉人止知京兆風流而其  
室之才不著若予友以宣平苗裔  
他日如吳猛飛昇已有樊夫人接  
引矣因已加京兆一等兩人相視



大喙因以題吳夫人詩

順治己未桂月東海胡文學題于

樂清堂



小引

余不善吟詩而喜讀詩然於名媛諸什多不涉筆愚以為詩之道本於性情而閨閣詠歌多綠衣紫塞孤鴈征鴻之感而未得性情之中正也若冰儂吳夫人則大有異予



桂苑曲江咸與蘭陵同一恩地稔其  
伉儷間盛事夫人望族而綦縞自  
如于歸而靜好無斁有鶴巢逮下  
之德誠得性情之正者也經史便  
充於腹笥吐納英華莫非性情所  
獨至直於名媛中另闢一開天之手  
使班姬左嬪輩當之有面墻而立爾  
具絕世才而不欲以才見卽予與  
蘭陵之交索其錦簇而未能也幸  
寒門浦恭人辱在贈答之末得於  
家雲孫案頭時見一班茲承令嗣  
貞服惠我全豹濯手濯目讀之數



過集中美不一度渺意泉湧純文  
綺立宛陵之淡山谷之竒荆公之  
工后山之苦靡不具備及讀其平  
于署中新製雅思避世金馬逍遙  
於蕊笈蓮舟夫豈誕哉古來松鶴  
輩出亦惟性情之至者為之以夫  
人之貞靜一旦羽衣葛巾吾知九嶷三  
島間將來增一蒲座矣嗚呼紅樓青  
草蟻聚梁蒸滔之同夢夫何投洗  
高風乃於香閨繡院中一見之也愧  
盡鬚眉矣予客武安初晤蘭陵飄  
飄塵拂所言皆出世事謂非夫人雨



花雲坐之二耶夫人自破迷津迹名  
譽而予于夫人則獨有憲昔謝道韞  
施青步障為小郎解圍晉書佳話  
流傳秦嘉夫嬾贈荅不列於炎史今  
蘭陵之才倚馬雕龍難夫難婦無  
圍可解五言亞于團扇之作溪閉閨  
闈青史能無遺憾耶不敏願效稗官  
以俟後之石渠弭筆者

乙亥新秋晉陵黃中瑄滄虹氏題于  
平于古刹



自序

余自稱歲癖于吟事學蔡女之琴書借甄家之  
筆硯緗素經心丹黃在手二十餘年驩虞愁病  
無不于此發之竊以韓英之才不如左嬪徐泚  
之句亞于班姬假使菲薄生于上葉傳禮經續  
漢史則余病未能一吟一咏亦庶幾于昔人也  
邇年覽墉城仙錄見諸仙女翬舉之事又讀陶  
隱居真誥誦九華安妃之言文采豔逸鄙心慕  
之雖游神州之五岳泛溟海之三山非女子之



事然睹烟霄眇日月不覺遠矣草衣蔬食聊寄  
吾志暇日偶理故篋見平生所作滿焉茂苑繁  
華紅閨風月一日一夕一言一笑顯顯然在胸  
中無遺忘夙習未能盡遣聊寫之成三卷入非  
桃李未得無言事異萱蕪豈能蠲疾投筆慨然

引

吳夫人名綃字素公一字冰仙家世三讓之苗  
裔歸高陽許氏壬辰進士蘭陵之配幼敏慧好  
書丹青不去手善繪事每經點綴靈動如生所  
居墳籍塞坐吟詠清婉吳中閨秀徐小洲能詩  
文端容善畫一時有盛譽惟夫人兼此二長或  
謂過之也性至孝二尊嘗有疾刺血書禱輒愈  
蘭陵多內寵夫人撫愛如同生時稱有鵲巢之  
德焉為文磊落有俠氣已而好仙嘗偶遇異人



示以前因居恒道服不為俗世粧梳泊如也家  
有古琴閑夜好風月時撫弄終夕不倦冷冷作  
雅操不為繁手淫聲尤工絲竹管絃諸雜技靡  
不盡其妙性耽奕不惜玉鈿寶釧聞者有睹却  
釵頭玉步搖之句誠閨闈之絕才彤管所僅見  
也有嘯雪庵集一卷行世吳門葉襄序

敬題修真圖

處妃降于雲中翩容與于江東冰玉于澄懷舐  
筆和墨于化工既翟弟子蚤被羗壺嶠于是從  
春月于秋日記玄元于祠太乙駕颺車于羽輪  
餐碧藕于白橘棲神志于黃庭妙吐納于長生  
侍鼓簧于吹笛睠並美于雙成嘆駒隙于景急  
時不可于再得迥蟬蛻于塵埃望姑射于何及

敬題長吟圖

閨中之秀林下之風望古遙集寄懷無窮綠窓



樂凡朗詠容容語吐珠璣韻戛絲桐傳播千秋  
是曰女宗

敬題浣蘭圖

蘭為國香衆卉莫比蕙之者誰洛川仙子浣之  
伊何高山流水絳雪是飡寶璐是被徒倚花前  
清芬徐起結撰本殊賞心惟此道左艾蕭自甘  
棄委

貞服念皇兩世凡囑題

太母夫人浣蘭圖

深苑天晶浩露光醴源采采沃新涼靈均欲紉  
仙人佩尼父初彈王者香道在優曇怡性靜斐  
瞻淇竹入吟長謝家最有青蔥樹彤史編摩屬  
顯揚

治民沈裕具艸

吳冰仙詩集小引

求佳人于珠翠之中求才子于筆墨之內是佳  
人才子離而為二不知佳人無才不得為佳吳  
夫人冰仙氏真可謂才子者也冰仙裔出延陵



為吳門名族蘭心蕙質雅尚書史幼即稱香奩  
宋玉金粉江淹吳中閨秀陸卿子徐小洲為女  
中先達惟冰仙過之既笄歸許蘭陵年翁蘭陵  
故是玉皇香案吏暫下人間而冰仙與之頽頽  
吹玉簫跨鳳凰秦臺風月昔屬傳聞今為實事  
顧冰仙夙具仙骨不好作時世粧于一切琴棋  
絃管之統無不精絕書法直逼鍾王尤善畫每  
經點綴靈動如生至性純孝尊人常有疾刺血  
書禱輒愈待蘭陵諸姬侍內外胥頌閔睢之德

為既而蘭陵壬辰登第冰仙貴矣居身清素不  
異道民釋子案頭香一爐茶一盞書數卷侍兒  
日磨墨以供揮洒其為詩清新圓淨不着一塵  
如花香如月光如水波如雲態務貴自然尤善  
深入極才人之能事西池上元夫人許飛瓊輩  
吾不知其才調何如量其氣體當讓冰仙三舍  
始信佳人才子合為一人矣予選名媛詩首推  
重冰仙顧冰仙方且事九轉丹視文字如土苴  
不欲流傳人間落浮名障中故詩不能多得然



光燄萬丈即在一字一句間在多乎哉然則此一  
卷詩不啻卿孌委宛之富矣梁溪鄒流綺題

嘯雪菴詩集

送春

茂苑吳綃冰僊

軟風吹日琉璃光纖蛾縈夢蘭被香錦魴掉尾  
波靨靨翠鈿細點鋪池塘赭汗驕行縱金勒輕  
紉夾鏡棠梨色西陵艸暖松刺新翠蓋飛塵歸  
路直紅鉛欲墜春烟動有淚無言暗相送高堂  
歌徹綺筵收歡餘坐覺羅衫重腰帶圍寬珠續  
續年年秣恨芳華促義和西轡為誰遲繞枝空





有蝴蝶

緋桃

火鳥撥刺海波紅  
神霞一片鋪天東  
風輕露重飛不得  
花蹊亂落猩猩濃  
曲房雲煖燒香燭  
鸞鬟半擁收纖玉  
明妝拭盡遠山愁  
髻邊一朶胭

脂熟

美人臨池

玉節玲瓏玉指勻  
琉璃雕画翠牀新  
閑臨幼婦題娥女  
愛染紅毫寫洛神  
蟬錦翼重絨恨易  
鸞

箋風便送音頻新  
來理繡心情減為託  
鯉魚寄

遠人

阮絃

似語喃喃指下遙  
抱來雙膝按當胸  
新詞月曉歌郎女  
巧罵春風薄倖儂  
雲駐梁空香地暗  
露寒花壓舞衫重  
楊家最是遲聲媚  
道語周郎未諳工

玉簫

薄醉濃香趁好裏  
玉簫閑吹傍樓臺  
微因風起



嘯雲齋詩集 前二  
聲初咽却和絃調拍又催白雪此圓尋變節朱  
櫻旋綻更含胎鸞騎何必乘風去六六雌雄鳴  
和來

牡丹朝雨

曉烟初動碧雲開荏苒天香薦夢來膩雨洗粧  
憐嫩玉軟風吹影蕩流盃朝陽豔指纔一捻工  
部詩腸知幾回傾國不煩還解語幾窺羅幙笑  
相陪

蕩子

蕩子無歸任處迷空倉常苦吏人妻海潮有信  
分明逝石闕無言枉自題弱柳宛憐眉樣淺天  
桃羞和面脂泥誰能獨向春光裡日日空聞聽  
鳥啼

七夕

星光歷歷漢悠悠悵望雙靈獨倚樓莫謂人間  
多別恨便疑天上有離愁梁清謫去誰相伴子  
晉歸來合共遊惟有月娥應最妬一輪風露不  
勝秋



七夕梨花

黃姑催嫁駐河梁素女臨流渡欲狂半擁玉衣  
窺曉夢亂飄霓序配雲裝深停細語凝芳雪淡  
洗娟痕度晚香憶道春慵解相遇暮寒庭院怕  
淒涼

春日同諸妹飲梅花下

春風曲檻醉霞卮一樹梅花月色遲  
朶朶相憐同覆本笑他連理妬傍枝

蘭吹

瑤琴鳴幽谷清韻發猗揚燕姑三春夢靈均九  
畹香敢言思公子空自懷謝娘願得雙玉蕊佩  
之以爭芳

春墀詠

群芳隨意種紅玉巧成葩朝雨染奇色晚風吹  
落霞窺簾香暗度照影月初斜梓澤春來樹何  
如潘令家

秋日客有賞桂者聊次其韻

叢桂繞幽庭淮山入座青香穠人易醉月好夢



初醒招隱開芳宴  
藏姬掩畫屏  
可憐新度曲  
瑤瑟若為聽

端陽次韻

暖玉輕纏絲線長  
喜看日影過迴廊  
爭花亂却鴛鴦佩  
賭酒輸將翡翠鐙  
月姊莫教裁桂扇  
風姨須避試蘭湯  
遙聞簫鼓知龍鬪  
應予孤臣千載芳

春雨

輕烟漠漠雨絲絲  
少女風翔便應期  
點白懶銷浮露粉  
泣紅勻重淚  
胭脂梨花夢裡寒  
猶逼芳草歸程遠  
更思長是三更破  
酒醒滴愁如碎斷  
魂馳

悶裏

坐惜年光鏡裡看  
一番花雨怯春寒  
閑愁漸嚼飴如密  
好夢空教意暫寬  
自度新聲牽怨易  
學裁詩句寫心難  
江淹有恨多吞淚  
玄鬢生絲擬似潘

嘲春風



九陌芳塵扇物華半闌朱戶半隨車初醺暖氣  
濃于酒乍宕牽魂勝比花多拂荀衣香遠送亂  
飄仙袂帶紛拏相將訝許無形影輕薄從來何  
處家

鳴琴

湯道琴心似客心臨邛何處有知音半籠玉手  
輕如揭旋語香絃思已沉三峽泉流巫女怨空  
江木落水妃吟多情爨下相憐者何事鳴蟬又  
遠侵

以菱實寄蘭陵有贈賦荅

濁水菱肥清水鮮撫思憑寄緩愁年新詞着舞  
江南曲唱與妖姬和採蓮

菱刺難將別袂黏菱花難照別顏纖共憐鮎實  
萍相似祇為辛多減口甜

蓮箭拳心耐苦持藕腸中斷萬千絲天涯淚點  
難相寄記取蓮莖有舊時

熏爐

挾轂君家白玉堂入門雙頰左鴛鴦何因分作



厨中妾祇乞勾除富貴郎  
統樹芙蓉蓮子種  
鬱林黃蘗苦心長  
羅幃弱蒂平生願  
願學熏爐沉水香

戲和詠手

春葱露洗玉  
摻摻一掬清  
波削月兼按管  
參差調鳳翼  
鳴箏出沒弄瓊尖  
因憐花好鬟頻整  
為寄魚封繡懶拈  
閑摘海棠看又撚  
巧侵蝶粉若為嫌

秋夜

玉露濕輕紈  
文犀已覺寒  
遊人歸未得  
秋影笑

紅蘭

竊得

竊得溫香異種春  
細鑄紅玉儼然新  
題詩借問河陽令  
浪折鸞枝贈甚人

維揚二分明月菴別外

一曲宮商韻正諧  
誰彈離鳳向琴臺  
邗溝夜月銷魂別  
巫峽朝雲薦夢來  
袍色長條隨綠艸  
屐痕金齒記春苔  
臨風一葉乘潮去  
斷續柔腸刻



九回

芳州舍香正合婚風波一旦忽星奔蕪城西月  
空殘夢隋苑經秋祗斷魂玉馬半垂還怯響文  
犀薄卧敢思温生憎月午陽関近清血偷沾別  
袂痕

惜別難勝怨晤遲重歡未卜早離悲  
龍將去璞碎荆山玉有疑百感悽心託何處  
函清淚贈臨岐叮啞更語隋堤柳莫學春蠶有  
斷絲

密信潛呼不憚遙樓東輕騎快鳴鑣明珠分浦  
難為合錦瑟危絃豈易調好夢湯憐難駐景妬  
媒無計可驅潮機関盡處還離別別後休教負  
此宵

淒涼琴羽動高樓一曲沉湘萬斛愁香冷繡衾  
餘病骨塵生羅襪莫凝眸雲迷楚嶺魂無處月  
暗南枝鵲湯投回首蕪城何處是一江烟雨弔  
孤舟

戊寅除夕



獨坐非守歲繁憂不成眠一年此夜盡萬事何  
時蠲椒頌愁難擬南枝信枉傳襄君魂黯黯  
影淚涓涓栢葉無由醉蘭膏惟自煎平生負氣  
槩遭世任迤遭報德誠非易術仇若罔然何當  
酬素志仰歎問穹天

吳中有唱和百聲絕句者命題恨于未雅然  
已煩翰墨不欲棄之聊存其廿首

罵裙

八幅湘波見似空雙鉤開處觸微風低頭帶笑  
輕輕唾掩歛纖腰面發紅

拜月

風動衫裾拜起遲堦前如倦又如疑星星自向  
團圓語除却姮娥不許知

晏釜

僕馬匆匆見楚臣蘭房晚日照窓塵露葵已熟  
銀鈿響常愧厨中洗手人

展畫

並出分明似兩身雒川誰寫應圖人窓前妝罷



還相比聽得開看玉軸頻

捉塵

玉柄持來隔翠幃松風拂拂手頻揮清談好個  
開人意閑與王郎試解圍

鳴鞭

馬上常誇似燕輕風前拋鞚恣驕行玉稍拂着  
黃金鏡愛惜驂騮不遣驚

擊劍

結束纖腰換錦裾軍家別樣巧粧梳西河一曲

旋風急會遣張顛悟艸書

弄珠

誰擘方諸出露團量來滿斗月光寒玉纖捧得  
還拋看顆顆勻圓濺玉盤

倚瑟

並席當年侍漢王羅衣壓地不教長高歌怨處  
朱絃促盻殺邯鄲是故鄉

熏爐

金毬舊樣自防風頻看香殘一點紅荀令近來



消息斷夜寒長怨玉牀空

曲句

手捧紅牙按節輕縑烟裂玉最星星偷聲一轉  
無人會應是樊家舊典刑

覓釵

一覺巫陽薦夢回鳳冠殼徹曉光來鬆雲散盡  
鴛衾薄移枕頻聞覓玉釵

汲綆

翠幌曺曺欲曙天轆轤啞軋攪春眠宵來酒重  
鴛鴦渴索取銀瓶飲少年

刺茨

軟温曾道似酥胸採得真珠蟬腹中試啟瓠犀  
輕嚙破春冰偏刺玉玲瓏

走雨

碧砌生苔地有泥東隣住處隔桃蹊花垂柳重  
偷相過聽得窻前玉齒齊

詛鶯

眼看繁華欲作塵金衣飛處發嬌嗔罵伊喚得



春婦去又向窓前喚起人

詰燕

一院東風絮似鹽梅梁雙到語喃喃問伊何事  
歸來晚賺煞金鈎不下簾

卜蟾

青青極日日當樓塵落空梁只自愁失喜鏡前  
輕一笑雙絲斜掛玉釵頭

飼狸

最說江妃嗜鯽魚深宮長日午餐餘狸奴走去

難尋覓教叩銅盤試喚渠

睡鞋

玉姬何處欲為雲錦被沉香徹夜熏紅繡雙鈎  
剛一指懷中輕墮是誰聞

搗鼓

樓下年時按柘枝靈囂聲裡挫腰肢偶尋舊譜  
堂前戲驚起蘭房學舞兒

繡衫

一片輕紗一片雲天孫機上織成文退紅小樣



花籠子閑著沉香煬火熏  
軟弱冰絲約六銖石花廣袖合歡襦分明玉腕  
金跳脫一架輕烟只似無  
愛得腰身尺六強銀星鈿尺自裁量琉璃窻下  
紗厨畔一夕秋風透體涼

元和才子更應無合把新詩画作圖一朶紅蘇  
花影罩雙文衫薄透凝膏  
誰向南朝見國娃碎紅鋪錦散明霞吳蚕軟弱  
堪憐處苒苒枝頭淡淡花

材地纖疎染色新日光初透隙中塵微瑕只為  
閑情賦不作輕綃覆玉人  
可知披縵最相宜金斗拋來試着時藻荇盤旋  
花葉細一池清水皺玻璃  
亂影渾如雉雪迴霏霏偏稱小身材纖襟莫愛  
輕風好行到階前不禁開

惜花春早起

最愛窻前膩粉光東烏初上鬱金梁輕拋睡鴨  
餘宵暖背掛盤龍未曉粧芳徑露凝鉤印淺嬌



房春暖蝶魂香可憐九十無多日雨妬風欺幾  
斷腸

愛月夜眠遲

星稀露重四更天皎皎當空玉鏡圓何處豔歌  
調鳳管誰家新韻度鸞絃烟痕砌冷文君錦花  
影寔分周昉椽一種清光千種看幾多惆悵幾  
多憐

掬水月在手

削葱閑濯小池邊愛弄娟娟片璧圓藕葉傾來  
珠影動方諸盛得露痕鮮難同玉珮投交甫未  
許輕雲蔽洛川祇似素娥粧始罷掌中擎出鏡  
中仙

弄花香滿衣

錦鄉春足軟風飄百和幽芬透絳綃折得盃懷  
閑自玩嚼成和唾染來嬌韓馮誤作芳枝繞荀  
令應嫌沉水焦莫訝世間無鵲腦蜀羅花氣更  
魂消

和表海叟八新詩



新烟

拂草看猶淺凝花放自遲  
朦朧塘外路似雨欲晴時

新草

春回碧玉綻雨過紫苞穿  
莫惜柔芽淺汀洲半似烟

新蝶

乍破莊周夢嬌魂出繡幃  
尋芳憐翅弱只向短牆飛

新燕

春半泥初軟花飛又一重  
盧家何處住故壘在堂中

新柳

短絲難繫馬嫩色遠侵池  
少嬾愁初日行人試折時

新鶯

啼處音猶澁飛高若自驚  
花間學喚友百轉未全聲



新月

雲淨天如洗  
織鈞近暮移  
妝臺何事懶  
祇画一  
邊眉

新水

一夜雨初足  
苔花記漲痕  
錦鱗知得便  
傳信慰

離魂

夏日

紅粉何當作  
曉粧  
轆轤修綆憶  
寒漿  
胡香成燼  
金猊冷  
湘簟凝波  
玳瑁涼  
碧樹影圓  
人晝寢  
石

榴花發日初  
長  
沉沉蘭室無  
消息  
海燕時時到  
畫梁

秋閨

欲將心事祝  
嬋娟  
願得閑雲去  
莫旋悞  
過堦前  
花影細  
忽當簾額  
浪痕  
鮮  
星星香露  
鴛鴦泣  
冷  
冷清商  
玉兔憐  
為怯  
空房  
婦不得  
躊躇  
倦倚小  
欄邊

題醫冢齋次黃皆令韵

幽人一畝宅  
烟景異  
塵間雲影  
沉  
清水泉聲落



近山金鷄穿柳去玄燕拾花還過客徘徊處應  
憐半日閒

嘯雪菴題咏

茂苑吳綃水仙

題梅花倒掛扇

寂愛橫斜月觀枝合樓丹穴鳳凰兒不嫌黃雀  
偏巢處絕豚青禽入夢時蕊迸藻珠銜自得花  
飛崑玉叫來遲簫聲誰作秦臺曲落盡冰魂世  
不知

翠鳥画扇

脉脉幽香偏破臘亭亭粉豔獨凌寒飛來翠羽



枝頭坐正是初晴日半竿

畫梅花

春回臘盡見瓊姿蜂蝶迎寒總未知  
窠是風前易惆悵兩三疎  
朶雪晴時

勻鈿搗麝占春先應訝東皇事  
分偏頻看莫辭羅綺薄飛來猶自可人憐

墨梅

懶將膩粉寫香腮洗盡鉛華一樹開  
蕊密祇疑籬下發影寒如向夢中來  
盈盈豔笑從人意落

落高枝未許媒靜掩孤山誰作伴  
瑤琴紙帳獨徘徊  
祇憑烟墨長根茂密處休教重粉堆  
却月觀前應最似一枝橫影落香堦

雪中山茶

海上仙宮似貴家朱顏流眄爛朝霞  
瑤簪墮影輕寒辟廣袖闌風錦障斜  
媚臉憑消胡粉靨春痕微破守宮砂  
朝來判取量顏色香重紅綿漬木衣



杏花

自是繁開却澹然一枝和醉向風前  
黃鶯啼處無人到宿雨淋漓曉色鮮

黃薔薇

嫩黃和粉笑時遲朱援輕擡一架絲  
大似姑蘓臺畔見繡榻閑倚病西施

茉莉

綽約新妝欲曉時故將清露洗凝脂  
天公應是修明月白玉玲瓏墜滿枝

蘭陵初第寫草花寄之

紅紫江南到處盈平田陂岸家閑情  
高樓妝罷殘香粉點染分明寄玉京

誰道仙郎不憶家馬蹄狂踏杏園花  
紅閨階下君應記烟裏玲瓏幾片霞

望斷長安輦上人馬頭何處見行塵  
深居點綴閑花草不及崔薇解寫真

可愛繁枝不得名春風滿紙枉盈盈  
京華君到看花日閑縱驪駒何處行



相思鳥

南粵春殘花未殘羽衣深暖錦成團佳名莫與  
離人說綵色惟教繡女看丹寔啄來妃子笑素  
枝銜去楚臣歎霜縑擬寫相思態應為傷心下  
筆難

莫聞名字便辛酸繡翼相偎足自歡嶺月交呼  
烟漠漠蠻花雙坐露團團琴中祇似朝飛雉鏡  
裏應憐獨舞鸞惆悵天涯人不到幾多情思向  
叢蘭

題蘭

深谷埋淪鄭國香紛紛蜂蝶笑空忙淡烟低拂  
春愁重弱管閑評幽思長

紫蘭雙蝶

紫烟初放日遲遲花氣迷人繫所思羨却韓馮  
雙化魄抱香穩睡在新枝

荷花

薰風物色到他塘競榜輕舟趁晚涼一朶波中  
紅徹底碧琉璃內見新粧



新荷葉

洛浦芳音新翠卷  
曛風暗拆障紅蕖  
從他波浪終連藕  
更看雙雙比目魚

錦邊蓮倒垂

風送凝酥隔浦香  
溫泉膩滑雪肌涼  
侍兒報道君王到  
倒掩鸞裾出浴忙

虞美人

為愛殘春一夕開  
豔歌聲裏舞腰迴  
翠鈿自映蓮花血  
爭遣韓馮冉冉來

蠹魄淪江岸芳英吐  
絳羅凌朝風露裏  
如恨楚人歌

忘憂州

柘黃抽嫩幹淺綠發  
新芽離恨方多緒  
空看一樹花

畹蘭應自避風流  
嫩筍含滋小葉稠  
軟碧輕黃空滿砌  
不知何處解忘憂

畫薔薇十二紅

消息春歸十二紅  
春痕微透粉光融  
偏開兩靨



胭脂軟輕減雙蛾石黛濃乍展芳心含曉露半  
垂嬌力驪東風丹青自古傳周昉綵筆殷勤惜  
未工

雙蝶

韓馮夫婦兩魂狂來往闌前亦自忙好日試調  
妝粉膩春風新繡舞衣裳冷多芳蕊鬢猶醺睡  
穩花枝夢亦香自與何人透消息等閑飛過宋  
家墻

畫扇

弄墨勾鈿意已慵強將枯弗代春工柔條日射  
臙脂瘦嫩瓣霞含膩粉融飛蝶似隨莊叟夢亞  
枝如帶楚王風量來莫訝工夫少祇被催成色  
未濃

海棠雙蝶

越中妖豔蜀中香疎雨晴烟搃斷腸滿臉慵來  
應是睡好憑蝶夢借高唐

海棠

帶笑含啼倚醉妝風前如倦慣佯佯蜀兒祇愛



芙蓉色不把文君比海棠

白燕

如玉雙雙透瑣闌鏡中斜見粉依稀西施舞罷  
春衫冷道韞詩成柳絮飛影過杏梁朝日淡夢  
醒巫峽片雲歸梨花庭院無人到不是開籠放  
雪衣

緋苑

苑葉枕根舊賜名想應花下贈卿卿輪迴天上  
仙人種暗度人間客子行似血千行啼別泪如

醜雙鬢笑風情長教洗面呈光悅好和三分白

雪英

夜合

胡香熏不歇荆玉淨無瑕愁見嬌房歛庭前白

日斜

玉簪

虛脆難勝手枝枝嫩玉稠漢宮如見採慮得近  
搔頭

秋海棠



花發珊瑚蒂微紅著粉腮夜深嬌不睡須待月光來

百合  
一幹雙頭粉項低玲瓏山石草初齊美人正憶  
遼陽信不覺欄前日又西

優曇花

琉璃地上長根芽摘得仙家片片霞祇有香風  
生碧落休教麗色點袈裟機邊錦段星娥樣步  
底金蓮鹿女花兜率宮中曾散霰梵音清徹聽

頻伽

蛺蝶

淺粉濃朱盡似飛雙雙蝶影拂枝歸韓馮夫嬾  
芳魂在淚血殷凝欲染衣

小闌干下蝶翩翩淡色輕香幾朵鮮莫道忘情  
似莊子夢魂何事到花前

栩栩搖花板亭亭立小叢青陵臺下見人道是  
韓馮

題鴛鴦画扇



浴罷花溪交頰晴沙春暖夢初圓漢宮曾共  
依珠樹秦渚相將弄碧烟飛向錦機成豔正棲  
來繡帳足良緣白頭願遂堪珍重何處盜菜更  
羨仙

相思鳥 癸亥閩中作有引

相思鳥出自閩中人多不見余幼從家  
君遠宦覩其五色燦如飛必連翅宿必  
交頰意即所謂比翼鳥也喜而攜歸偶  
為鼠所傷其一存匹悲鳴不食而死余  
甚異之因圖其並形以次記題焉

宋王小史是多情未及相思繡羽盟明月交眠  
憐一影春風相喚聽雙聲荔枝香冷魂俱斷蘭  
莖瓊抽夢合驚馴擾紅閨牽別恨閑將彩弗記  
佳名

其二 吳門作

春風好鳥號相思迴合殊翁宿錦枝密語莫教  
雙燕妬幽情祇許兩心知疑分花影頻相顧為  
怯雲羅不暫離何處荔枝香遠送故園回首不



勝悲

梅花幃十絕

霜雪精神鏡石腸南朝賦格未相當夜寒獨伴  
橫枝卧斗帳私聞玉骨香

一片冰心絕綺塵幽芬清韻是天真孤山風月  
吾頃友肯逐凡芳委俗人

疎枝聯幌月鋪茵清影寒香籠玉人一枕羅浮  
春正美生憎翠羽喚聲頻

影隨柔翰帶烟開馥馥冰魂侍寢來憐我獨眠  
容作伴休教絨帳近風埃

秋窓夢覺月朧朧纖薄齊紈望若空好似凌風  
臺畔見渾身苔粉素烟中

珠離玉綴幾枝迴正是天明半欲開一道月光  
寒不動透簾應有蝶飛來

剪綃零碎玉痕輕風動香寒覺夢清閑傍枕函  
思往事松林殘雪憶西陵

滿眼冰霜發較遲隴頭相寄寂相思自憐瘦骨  
春來病閑倚薰籠看折枝



波紋風蕩水溶溶  
粉膩香愁四体慵  
自與東君  
通信息不將顏色惹游蜂  
踈影斜柯冰簟涼  
清宵相傍玉肌香  
曉寒欲起  
渾無力四面烟雲覆海棠

畫扇寄蘭陵

異種名花露下鮮  
絲絲藤蔓更相牽  
昭君塚畔  
霜中艸鹿女  
窓前旱地蓮  
寶帶可憐金片小  
羅囊爭認紫苞妍  
画成持寄章臺客  
莫愛乘鸞向碧烟

蘭

幽谷青青會見埋  
幾時芳氣入君懷  
琴中彈得  
心應解莫遣飄纓掛鳳釵

菊

剪剪西風拂曉來  
散金攢玳一時開  
南山山下  
東籬畔低采何曾泛玉杯

薔薇

接地盤空一架紅  
碎霞凌亂日曛曛  
看来忽憶  
隋家事蜀錦帆開綠樹中



墨梅

盈盈愁怨正含思  
日薄烟凝玉一枝  
好似夢醒  
明月夜粉牆斜  
映影參差

佛手柑

拂拂搖香欲襲裾  
千頭空喚李衡奴  
柔枝倒掛  
垂秋露却似觀音  
弄寶珠

蠟梅

叢叢依淡日  
拂拂帶微霜  
檀注深含  
紫凝膏透  
着黃蘭芳  
饒作珮菊  
淺稱為裳  
借問官中女  
何如額上妝

白菊

細疊齊紈素  
輕明不染黃  
冢冢葱指  
摘偏入玉  
杯香鴛瓦  
新霜薄羅  
窻隙月光  
梅花爭比  
得猶自帶  
微妝

山茶

重綠經冬葉  
深紅映日花  
渚蓮鬚錯  
落叢桂影  
交加檀注  
應難比猩  
裙漫自誇  
子瞻憐鶴  
頂窠喜不  
天斜



題画扇

曾見南朝畫國娃  
羅襦細點貼明霞  
香鈿受露盈盈歛  
膩靨臨風一一斜  
莊蝶粉輕應有夢  
沈郎錢小自堪誇  
洛陽繁盛今應在  
幾種穠芳似此花

野薔薇

淺粉輕紅漠漠香  
纖鈎綠帶不禁長  
東林永日窺人處  
無事遮伊宋玉牆

菊花

一種迎霜自出塵  
籬邊顏色百般新  
陳王不愛凡桃李  
獨把秋芳比洛神

紫薔薇

紫禁投籤夜正遲  
碎紅星簇滿高枝  
莫嫌溫樹無人識  
曾見仙郎起草時

梨花白燕

翩翩如玉踏銀鈎  
春入梨雲晚景幽  
白紵舞餘西子倦  
齊紈裁出漢宮秋  
月明簾幙孤烟冷  
雪暖池塘亂絮愁  
誰繫紅絲心自切  
伴人長嘆在



高樓

優曇花

寫出西方錦一枝鉢中移到未為奇  
寂宜天女飛行震亂雨如來說法時  
色重若花春日暖香生蒼筍受風遲  
誰從教外傳心印微笑拈來意自知

青鳥海棠

朱鳥窓中見阿環便迴雙翅返崑山  
海棠枝上因何立應有人間別往還

梅花

擁袂朝寒怯來者已較遲玉銷初落  
霰珠綻欲開時香重魂先覺雲深夢  
自知何言冰雪骨依暖發南枝

鸞

翡翠毛衣赤玉冠飛飛閑啄碧琅玕  
女牀樹冷棲休穩漢殿香沉去自難  
舞影頻迴月空簫聲遠隔紫烟寒  
雙成曲罷仙郎醉良夜堂前幾度看



百合

檀心玉骨是誰知  
一晌含毫憶所思  
靜院無人香寂寂  
小闌春鎖粉離離  
雙頭背笑爭開處  
一朶傾身欲頷遲  
曉月帶烟粧黯淡  
白人惆悵怨微之

紅梅

點點深紅色  
南枝映日光  
應嫌穠李淡  
自是海棠香  
巫女含輕怒  
昭陽帶醉粧  
天然標格在  
猶得占年芳

梅花贈侄

靜裏休教冷似灰  
蒲團消息一陽回  
南枝解報東風信  
試問春從何處來

錦雞

弱莠低垂錦翼棲  
自緣名好占芳蹊  
雲鬟鈿朶始娟墮  
羅袖金泥點點齊  
海客祇能携滌石  
楚人虛道進山雞  
五更風雨藤蘿重  
待爾殷勤犯曉啼

木樨



擣麝成芳朵傾苞似撒金臨風香嫋嫋含露夜  
沉沉皎潔宜秋爽淒涼怕晚陰留枝贈佳士黃  
雀莫相侵

草花

石瀨淺淺鮫嫩霞珊枝玳葉影交加水神祇為  
承羅襪細剪金鈿照浪花

茶花

小樹交加發粉葩綠旗猶未展新芽仙山石瘦  
生香澁百艸前頭第一花

洛陽蛺蝶

小紅鮮碧向東風閉鴨闌邊亂石中花影不知  
春欲去韓馮應道太匆匆

金絲荷葉

透網珊瑚出小枝闌前石罅見紅絲暗藏蟋蟀  
吟秋夜穩坐鳴蛙叫雨時映艸長來香簇簇和  
苔生處碧離離低窻月下墻陰冷數點田田祇  
自知

荷花



纖莖苒弱醉顏酡  
雍浦亭亭出綠波  
錯采不禁朝日照  
深紅偏愛晚霞多  
香生膩粉凝丹頰  
淚灑圓珠濕萬羅  
飛起鴛鴦一隻去  
塘邊誰唱棹歌

石榴

紅羅簇簇碧闌前  
正是輕衫入夏天  
深避春風緣底事  
當時來晚為張騫

桃花

更無言語向春開  
漠漠輕輕紅染粉  
腮誰識秦人避秦處  
不知迷路為君來

海棠

可似朝陽酒困時  
春風乍暖欲開遲  
烟啼露泣無人見  
惟有紗窓明月知

梅花

冉冉輕苔細細烟  
前郊一夜百花先  
育長影好霜鋪地道  
蘊詩成絮滿天  
窗外不禁斜照暖  
簷邊亂笑受寒偏  
周秦何處曾相識  
月地雲階見

洞仙



榴花

莫恨花時不及春，愁闌對此倍傷神。  
自從五月初開後，直至深秋不見人。  
綠地細鋪機上錦，紅苞輕綻鏡中唇。  
猶勝紫陌閑花艸，祇逐東風馬上塵。

梨花雙燕

雪壓高枝一燕穿，深沉院落淡風天。  
方諸有淚嫦娥泣，胡粉成霜美玉眠。  
好夢醒時雲暖暖，凝魂無主蝶翩翩。  
詩中隱語須迴避，離恨于今已

隔年

芙蓉

江上秋風木末花，池邊籬下是誰家。  
西施舞罷楊妃醉，粉臉低垂片片霞。

紅梅

朶朶胭脂早日中，濃香偏愛逐霜風。  
孤山居士高栖伴，閑倚墻邊學傳紅。

梔子

紛紛脆玉露精神，香惹羅衫月下新。  
一朶同心



何處好蕭娘曾道最關人

題画屏花鳥

鳥曰吐綬余數歲時從先人宦遊閩海  
得之額下垂五色纍纍者時舒時卷舒  
則爛其盈几光燦陸離武安署中偶寫  
以追昔遊

紅蕉風裡聳翹冠若若胸前錦一團花下立時  
還自愛烟中飛去獨矜看昌容草染朝霞嫩阿  
毋桃開海日寒底到丹山朝鳳鳥偏垂重綬押

鷓鴣

往時余里李侍御按海南攜雙孔雀作  
紅樓三十級居之詠以志物匪敢傳邊  
鷓鴣五圖也

頻稱都護帶南音獨閉朱樓萬里心舞處自饒  
花作毳妬時休着絳為襟蠻風雨濕愁金重瘴  
嶺烟寒覺翠深公子画來應索惜銀屏燭影夜  
沉沉

鷺鷥



芰荷風裡片雲輕影落澄江水面平玉翻襪  
當草立素絲悠颺怕魚驚鷗裘漫貫相如酒羽  
服曾聞緱嶺笙露下白蓮香動處祇應相對兩  
盈盈

兔

穿雲映水見精神爭愛微涼夜景新兔隱素毫  
常擣藥桂歌斜影欲撐輪雲為堦砌偏宜舞霓  
作衣裳自有人穩宿枝邊雙翡翠清光錯認是  
侵晨

野雞

出沒青林百艸腓漸漸麥壠閑踪稀廣場漫自  
矜冠距阿閣曾憐借羽衣鏡裏幾回看獨舞琴  
中何處聽朝飛如皋一發佳人笑閑把籠媒意  
氣歸

鴛鴦

水紋如画藕塘邊錦翅雙雙慣並眠極目琉璃  
歸遠浦一身金翠罩輕烟雨穿荷葉珠光濺香  
唼浮萍鈿點圓底事莫愁乘兩槳驚飛還逐木



蘭舡

白鷗

浴水眠沙骨格清  
月中霜下轉分明  
鶴翎勻簇  
冰花冷鸞尾長  
垂翠點輕玉  
樹歌闌張  
貴嬪瓊  
田舞罷董雙成  
閑來水畔亭亭立  
相顧忘機底  
性情

鶴

丹沙成頂雪  
毛衣亭立應  
疑甲子非  
警露啖清  
曾破夢凌雲  
翩健待高飛  
溪邊斷岸松  
為徑堂  
清陰竹映扉  
步啄徘徊閑  
處所主人猶是見  
來稀

鳳

五色離披海日光  
九雛天上自相將  
崑山宿處  
瓊枝滑丹穴  
歸來竹實香  
舞翼如干常  
翩翩歌  
聲應律慣鏘鏘  
高臺傅粉秦王女  
玉管偏憐一曲長

槿花

幽客籬邊不惹塵  
風前露下綻香唇  
雲遮羅袂



當巫岫日射朝霞見洛神燭下花生宵醉重臺  
前粉薄曉紅新妖姬歛笑深宮晚虛裂丹繒為  
甚人

題梅花倒掛扇

踈影低橫帶月籠寒香輕溢錦箋融疑傾合浦  
珠盈寸似種藍田玉滿叢乍碎冰魂憐繡幕斜  
行粉淚背春風綠衣自對芬芳語好訴離居向  
夢中

人面桃

風中能笑露中啼脉脉無言日又西千歲托教  
波浪隔人間一夕已成蹊

白桃

緗核初來阿母家瑤池千歲始如霞人間地簿  
無顏色却向仙源作白花

緋桃

開年仲月百花新仙樹酣紅照路塵浥露隨風  
君莫恨曾經狂煞曲江人

並頭蓮



並照芙蓉影雙雙似鏤金連生一枝藕苦抱兩  
邊心絲繫湘波濶珠拋漢渚深圓荷難作鏡共  
掩翠羅襟

鷹

萬里搏空敵海鵬絲絲聯繫教來成風吹翔氣  
翎新足霜肅高穹眼乍明豪客自修花架養王  
孫曾看錦鞬擎朝來試獵金鈴撼血灑平蕪燕  
雀驚

題梅花画扇

一回春信到天涯微笑筵前半面遮莫愛粉濃  
偏黯淡家憐影瘦欲橫斜當寒更覺香生雪顏  
怒何曾類襯霞誰道廣平詞賦好不將心鐵詠  
梅花

海棠十二紅

春溫嬌叢暖欲融仙禽梳羽出花中繡衣齊剪  
排殷點醉靨微迴怯曉風須遣梅花親國色莫  
教孔雀妬深紅朝來珠露沾香朶浥洒胭脂訝  
許同



落梅聞香鳥

濃日和風景色賒春光消息在天涯翠杖藻殿  
窻中鳥玉點秦臺曲裏花倒挂輕身香處住閑  
拋瘦影月中斜雒陽一片還如雪銜到城西第  
幾家

梨花虞美人白燕

嫩白深紅雨後多一雙如玉暫經過施朱應自  
能窺宋傅粉都來不姓何掌上祇矜皇后舞帳  
中曾聽楚人歌簾前相映依稀見却啄香泥上

舊窠

老梅

春迴地底動芳根紅日東南曉色暎乍長碧條  
添瘦影漸看珠蕊迸皴痕霜寒老幹疑侵骨香  
入枯株似返魂好作仙槎浮漢水一枝猶可贈  
天孫

梨花白燕

曾向釵頭仔細看陳宮瓊樹已歌闌銀河浪淺  
霓裳薄洛渚風迴雪影寒滿院殘春香漠漠一



枝和露月姍姍盧姬家  
如花間舞深下珠簾欲  
進難

青蓮花

帝青顏色妙蓮華香水河中植寶沙為是法王  
隨處雨仙仙一朵落儂家

牡丹

翠幕穠春已十分籠烟颭月醉氤氳楚臺賦就  
雲為夢漢殿仙歸鳳作群錦段織來何處寄胡  
香竊得與誰真江淹綵筆多新句應道闌中露

有文

十二紅

低首梳翎向晚風春叢烟濕住花中惟應孔雀  
偏相妬齊剪勻排十二紅

白牡丹雙蝶

澹烟深鎖一闌香露態猶含曉月凉栩栩祇應  
憐國色粉衣輕惹額邊黃

草花

無言帶笑似凝思深淺高低各自宜蝶魄含愁



春欲去莫將花信報伊知

桃李

二月東風正暖時成蹊何處寂寂相宜漢宮邢尹  
當時意相對無言各自知

芍藥

乍破香苞露臉新宣城何處贈佳人晚來烟雨  
須頻護開鴨闌前已暮春

荷花

浪說齊宮步步生秋風湖上窠盈盈根連脆玉  
和絲瘦葉濺圓珠帶泪傾赭鯉挾書穿影戲文  
鴛雙睡觸波驚江妃晚起朝粧懶鏡裏斜紅半  
未成

朱藤花

步障綠山盡紫絲臨風映日自低垂莫言嫋嫋  
渾無力待掛高松百尺枝

鄰姬持綉花裙六幅索題遂為賦此以塞白

牡丹

簇翠籠烟點綴新越羅香軟露華春謫仙不詠



昭陽燕只解將伊比太真

木芙蓉

胭脂紅冷怕風吹半醉和眠笑靨回應是採蓮  
人去後更留香影水邊開

蘭花

風綻幽姿露洗粧纖纖弱態怯秋光紅闥盡日  
閑無事繡出騷人九畹香

水仙

淺碧羅襦鞵起塵盪盪波上見仙真瑤宮貝闕  
風應好雪乳吹來點點春

梅花

輕風動處暗香飄幾夜春寒雪不消瘦影一枝  
和月照橫斜欲墜似織腰

荷花

江上秋風發豔姿深波款處半酣時清芬鬢  
烟綃薄楚楚纖鉤步步宜

咏菊十種

月下西施



吳宮鴛瓦新霜薄，愁損宮腰一尺。搗月底，羞容  
看不足。夜深應聽採蓮歌。

純白

細疊齊紈雪，乳葩仙姿明。娟絕塵華，騷人莫把  
江梅比。秋月春風各一家。

淡黃

一種迎霜淡，出塵籬。遶初綻，色偏新。青腰不羨  
凡桃李。栗色生香似玉玕。

狀元紅

宮袍簇簇賜仙郎，沉醉瓊林。茜錦章，莫恠淵明  
偏見好秋光。此日勝春光。

傲霜

凌霜欺露嫩，鶯黃秋老東籬。更覺香清艷，自憐  
人莫比。玉妃初作道家妝。

猩紅

煉得丹砂散，作花海。風吹落，綴山家。嬌娃競訝  
胭脂熟。浪摘芳英染素紗。

醉楊妃



秋波橫映玉容酡欲舞霓裳奈懶何笑倚君王  
低索睡月斜宮漏半宵過

檀香毬

百和無緣近佛前真芳室色靜如禪誰將修月  
吳剛斧借與金商琢得圓

桃核色

百種秋芳各有名此君未識却難評色偷香核  
新堪愛雅比澧蘭更有情

曉霞粧

奪春剪綵嬌難比婺女鍼神繡出非玉腕曉粧  
霞作式謔疑如意佐宮妃

畫綠牡丹

鈿痕淺粉拂花心一種清鮮嫩麴塵翠幕影籠  
春淡淡綠波光動月粼粼改妝定有深機在避  
艷還應蓄意真若向沉香亭畔種渾身全似昔  
時人

浣水丰神帶曉烟搓成嫩柳舞腰妍可容碧玉  
風前艷祗合方諸露下鮮色淺荷裳非楚製香



濃蘭佩却天然青青無限玉孫草不學齊宮步  
底蓮

銅雀伎

霸業山河在三臺不復春當時望陵處松柏亦  
成塵舞袖閑雲薄紅顏野草新惟聞王子敬曾  
道冢關人

題銅雀臺

漠漠西陵艸樹荒兩朝孤寡恨興亡曹公大有  
英雄處不許袁家作帝王

豆英花 題画扇

曉風濃露濕游塵碧玉初成小英新最憶紫苞  
香綻處陌頭惆悵送餘春

題画折枝梧桐子

未作秋琴思有餘嫩香輕惹翠羅襦鳳凰栖處  
聲偏好微雨漼漼滴亂珠

題畫

赤城霞片片玄圃玉枝枝顰笑全無定穠纖各  
自宜絲披朝露重恍惚晚風吹瞥見霓裳舞還



驚剪綵嬉瓊樓傾豔質銅雀如妍姿春入清平  
調香生雕珮辭偶然耽弱翰莫作化之期

梅花

漢殿香銷悵落梅飄零無復向春開香魂莫待  
招魂賦自到羅浮夢裏來

芍藥

小謝堦前草翻翻自任風何當溱洧上攬取一  
枝紅

梅花白團扇

素魄含清影搖風發暗香可憐班女意自闢壽  
陽粧折寄行雲使懷為墮月郎不愁簫裏落祗  
怨篋中藏

桂花團扇

印月裁純素迎風點粟黃昨宵廣寒殿乍發一  
枝香

燈花

曾將喜信報卿卿歛拜臺前最有情絳蠅飛香  
雙盞拆銀盤和泪一枝輕漏聲滴露織紅爆舞



影迴時采暈生可愛鏡前收墮燼  
新妝添得遠山橫

秋意

相如綠綺秋絃急霜侵樹影寒  
蛟立塘水泠泠湘珮清遙山翠淡  
巫娥泣嘖嘖蟲吟四壁空千金賦得長門宮  
含毫思苦朝來渴病骨生春蜀酒濃

曉幃

夢裏鴛鴦妬曉鶯喚來無睡海棠驚城隅日射

羅敷怨綺閣朝新江總成葢蕊春風殘力困蕙  
蘭吹咽語音輕閑憑深淺量花色催整新妝又  
懶生

題扇

秋紅乘日影鳳子自雙雙粉蛾何事意只解赴  
銀缸

優曇花

纖纖瓊葉謾交加西國迢迢萬里賒何似素娥  
誇桂樹空教阿母種桃花法造散處重重雨天



外飛來簇簇霞一笑如來緣底事風前不遣點  
袈裟  
沒地飛空萬朵芳繽紛如雨梵聲長莫教千色  
毫光裏染着袈裟一點香  
誰見金仙說法時羽衣天女滿空飛紛紛花雨  
雲中墮靜色靈香不染泥

秋雨

銀燈紅慘夜沉沉雨滴空階淚滴襟楚客惜離  
悲獨處茂陵多病費長吟愁淋劍棧寒聲撼夢  
遶高唐暮色侵江上傷心還極目蕭蕭恨血濕

楓林

桃花青鳥

愛得嬌姿點點凝羽衣獨立有名稱墻頭溪畔  
尋常見傅粉施朱而不勝風裏繁枝千靨笑水  
中閑浸一壺冰花源幾被漁人識飛引仙舟入  
武陵

梔子

紛紛脆玉露精神香惹羅衫月下新一朵同心



何處好簫娘曾道最閑人

杏花黃鶯

淡蕩春光二月中名花無處不相同玉清醮罷  
仙衣澹西子歌餘酒態融潤色最宜當曉露和  
聲偏趁逐東風文君機上分明見一隻金梭萬  
點紅

楊柳

裊風拖雨力難支鎮日池塘屬阿誰早逗春光  
舒媚眼長垂舞帶逞柔肢永豐荒谷新移種灞  
漣行人舊折枝最是藕花藏比翼三眠三起少  
人知

題山水圖

丹崖蒼岑玉磊珂青雲紫霧深凝瑣峯頭卧虎  
沒金髻澗底眠龍抱珠顆瀑布虹懸千仞餘碧  
溪如縠週迴邏悠悠日月仙人家籬邊亂落琪  
花朵陰濃灌木影參差烟深叢竹青婀娜古寺  
踈踈度遠鐘籥風葉雨秋聲夥

詠燕十首



水閣他塘觸處通  
輕身高下趁東風  
柳綿如雪  
花如雨  
銜取春光入夢中

陵谷千年幾度移  
蘓臺麋鹿草離離  
西施舞處  
伊曾到  
應識當時金鏤相

春暎泥融日正長  
珠簾高捲鬱金堂  
莫言遠志  
慙黃鵠  
誰得如伊住画梁

認得雕簷却又飛  
雙雙自逞好毛衣  
春閨人病  
誰相伴  
應倚闌干待爾歸

似袍春艸滿芳郊  
拂掠風中覓舊巢  
忘却盧姬

曾住處頻頻雙語立  
花梢

玉堂春暗綠霏微  
軟語差池出錦闈  
銜足香泥

花徑晚半拖紅雨  
透簾飛

綽約腰身占漢宮  
昭陽花落雨溟濛  
須知掌上

閑來往會向高臺  
學避風

長日無聊散又借  
柳風花雨夕陽堦  
雙雙擲影

妝樓外擬上佳人  
白玉釵

剪剪風中貼地來  
深沉院落小身材  
黃姑一別

無消息空帶飛花  
拂鏡臺



南塘風急雨初斜  
香口新泥帶柳花  
覓得舊年  
栖穩處可憐猶在莫愁家

題秋景圖

溽暑初收露橫長  
天明淨早涼生塘邊日照  
秋容醉  
風清好鳥鳴  
點綴幽光供韻賞  
相將物色共含情  
丹青祇合安仁賦  
未許多愁小  
宋鷲

嘯雪庵新集

茂苑吳綃冰仙

十二月樂府詞并閏月

正月

嫩雲澹澹開空碧  
排冰衝雪春無力  
遲光添色射簾花  
豐玉痕融貼瑤席  
鳥語驚眠曉烟裡  
綉幙羅屏花媿媿  
佳期消息在新年  
鸞鏡紅生小姑喜  
誰寫宜春帖  
錦相冷金星澹  
桃花昏

二月



輕風疎雨收寒早白門柳帶拖烟草艷能花暖  
細腰慵燕睇雕梁菓未了韓馮夢重粉翩翩桃  
蹊李徑暗相連潘車果滿婦轅晚古陌塵香寒  
食天

三月

風吹亂絮雲盈盈花壓粉墻圍笑聲中園美人  
歌扇薄金釵夾羅香汗輕燭淚堆盤夜來宴華  
堂纓絕誰相見脉脉嬌魂啼不歸蜂語枝頭香  
幾片紅迎日影花滿腮畫屏翠幙烟波開陌上

城南採桑路朱輪輾處添青苔

四月

生羅畫團扇蘭堂白日長錦箨墮初筠開簾膩  
粉香風起薔薇紅簌簌遠山愁翠堆穠綠南塘  
雙槳閑不歸田田細點清波感

五月

小口銀瓶瀉輕綠寒影花生濯纖玉細葛如烟  
湘簟清香濕紅綃睡新足綵絲繫臂當佳節塘  
邊古柳新蟬咽園葵垂葉危芳根當花朵朵凝



嘯雪齋新集  
程血

六月

鴛鴦瓦熱塵如夢青樓日射瑠璃縫若花穠色  
火烏慵桃李芳陰圓不動着體輕紉踏節人  
脂襯肉垂鬟重金屋薰風夜飲涼冰壺玉冷寒  
漿凍

七月

鮫絲澹如水草草天將曙雲薄不成峯微涼吹  
碧樹芙蓉倒紅影頰魚鱗鱗渡頭桃葉晚歸

來雙橈珠濺橫江濶

八月

磊落疎星天宇濶紅桂香寒蟾兔活廣庭如雪  
展朱盤華筵中酒哀絲發阿侯蘭室香濃處月  
到花梁燕初去綺帷影薄滅銀缸意恹新涼天  
未曙窓中碧葉露團團一片巫雲暗相遇

九月

風捲乾紅積如掃水清石秀寒生早驪歌何許  
送行人鴻鴈一聲天地杳孀閨愁卧掩雲屏斜



日空庭夢未醒塞深草白魂迷處昭君塚上還  
青青

十月

霜乾葉欲盡平林森似束微暎有花開愛景明  
初旭鴈聲何處去征人望寒服好憶寄衣人寸  
寸燒紅燭

十一月

香暎氍毹紅金壺桑落濃玉匙開鎖通新客朱  
門戟帶吹嚴風錦袍分縫花枝整長袂雙雙拂

嬌影曲房深密後園開一夜霜痕合金井

十二月

濁波凍合黃河曲豐狐夜走尾獨速北風吹面  
客裘單百石強車輾寒玉短日蕭蕭人草草霜  
生翠髮朱顏老平雲千里散鹽飛一枝破臘香  
生早

閏月

羲和不住嫦娥老晦朔參差數階草殘寒騰暑  
為誰遲斗柄徐迴天杳杳莫留歡樂待新年東



風偏惜春來早

秋聲

八月風清殘暑收  
平沙鋪月雁南指  
蕉破荷稀  
蘭葉黃商聲殺  
殺林中起  
古來何物最  
悲人三  
峽啼猿朝飛  
雉爭似秋聲  
解斷腸  
刻骨霜刀射  
心矢此聲不入錦  
筵中  
此聲不到羅幃裡  
酒濃  
香重摠不聞  
聲聲偏入羈人耳  
文犀枕冷夢魂  
孤孽袂開簾  
閑倚徒鳴蟬  
嘔軋蟋蟀吟  
潑刺驚  
鳥飛不已  
別有無聲似  
有聲切切  
幽幽心欲死

吾心不為別鄉關  
吾心不解悲羅綺  
一片傷心  
萬種思自憐  
薄命如秋水

感時

幽蘭葉青青  
朝槿花燁燁  
槿豔不崇朝  
蘭芳常在篋  
客有感時者  
為佐蘭槿  
篇蘭以喻幽貞  
槿  
以比媚妍  
媚妍多所宜  
願盼自生姿  
嬌喉歌宛  
宛長袖舞遲遲  
傷人交口稱  
謂言絕世奇  
非徒逞顏色  
亦得掩瑕疢  
幽貞徒自憐  
腸車恒轉轉  
豈虞紫奪朱  
寧知黃避綠  
古者重同心  
時人矜



晴雪庵新集  
五  
悅目慷慨日悲歌聊持寫心曲朝槿植庭前幽  
蘭委空谷

邯鄲篇

吾來平干中春風花簇簇依然入窮冬日月一  
何連西風揭地來對影相催促邯鄲呂翁廟菜  
祠開古屋當年范陽生三十無寸祿徒爾握隋  
珠無人剖荆玉袒褐走田間往來空僕僕邱舍  
值呂翁方瞳碧雙目堂堂好鬚眉談笑歡方足  
忽然氣冲襟自嗟還自忽呂翁顧之哂子生何

自局但令投枕眠莫憂塵土感魂交若有睹幻  
境紛倚伏拂衣謝蒞茅締結連名族僕馬生輝  
光聲名漸芬馥淡墨署黃紙遷鶯出幽谷得意  
馬蹄輕看花曲江曲釋褐得畿尉一麾驅丹轂  
試問爾何功鑿河通漕粟仄沙烽候警天子思  
頗收雙旌引黃鉞車騎何燁煜妙畫開窮邊天  
驕盡崩角歸來坐中書君息正優渥一旦遭具  
錦蒼蠅玷貞玉低眉獄吏貴搶頭將相辱幸免  
李斯誅難辭屈原逐展轉赴炎荒憂來淚相續



天道有回環人理往必復還君政事堂四海爭  
瞻矚三垣平泰階四序調玉燭同心蕭與裴相  
得猶蘭菊玉樹羅庭前煌煌緋與綠倏忽五十  
載得喪何翻覆拭目久伸時霍如蟬蛻殼斜光  
穿隙明黃梁炊未熟妻兒與富貴都知不相屬  
奮身塵網間高舉追仙躅吾觀開元時姚宋秉  
鈞軸中外多清晏農桑有餘福俄然林甫貴倏  
聞國忠戮迄于天寶末蒼生罹禍酷賢奸同一  
夢誰似盧生覺人生欲無厭假物以充欲外物  
既無窮浮生常碌碌辟如蚕吐絲紛紛自纏束  
呻吟役為王擾攘蠻戰觸悅忽周為蝶低迷蕉  
覆鹿至哉古人言飲河惟滿腹不勞煉八石不  
勞斲五穀但悟夢中身便上神仙錄咄彼當權  
者區區何數數為作邯鄲篇願君時見讀

題香月舫

只尺壺中地幽居是所宜仙枝香藹藹碧月影  
遲遲琪樹藏鶯密名花帶蝶移低墻圍粉色輕  
幔惹烟姿庾信魚成寸王恭柳吐絲盆梅橫寫



影庭艸碧含滋宛轉通蘭閣遲回繞翠墀氤氳  
 花氣襲蕭瑟竹聲吹閣小唯容膝窓虛稱画眉  
 蜀琴清素手鄂被擁凝脂豈止容桃葉猶堪舞  
 拓枝傳籌拋小令刻燭課新詩西母桃留核餘  
 杭酒在卮鏡鸞金被穢箏鳳玳叅差招隱還成  
 賦抽毫湯進辭仙村迷不遠洞府到堪疑宿雨  
 聲飛夜朝風欲起時未須蘭作楫只合繡為楫  
 夢繞江南處烟雲去不知

題燕寢凝香樓

何處神仙宅樓居燕日長玲瓏開碧幌宛轉抱  
 斜廊星漢臨蘭牖虹霓壓杏梁遊鷗飛不逮高  
 雁過應妨丹嘴當窓喚鳥衣遶樹忙楸空光肅  
 肅槐密碧蒼蒼畫障禽名孔翻階蝶姓莊溱籠  
 溫宿火椽蠟耿宵光坐嘯時多暇鳴琴夜未央  
 對談棋列陣小飲酒成鄉書去目青鳥簫清待  
 紫凰頌耕初得句聯絮乍成章霞袂留仙裝蓮  
 冠學道救蟾栖憐月迥雀路羨雲翔遼廓如堪  
 問青冥豈可航無勞還吊古銅雀倚清漳



異夢篇

閔睢美后妃之德詩三百篇房中之樂  
為真祖云蘭芳玉潤曩哲未免留情事  
感恍忽開閣不吝若夫天巧之合大賢  
者主其間何必古之女宗女師哉爰命  
彤管以勒風箴

周蝶自恍惚蕉鹿徒營營誰言役與王變化由  
想成至人齊夢覺不隔神與形魂交睹未然往  
往甚分明秦穆遊鈞天文王錫九齡神理有福

善倚伏或難精彭鏗稱長年所得目雖羨三言  
却熒惑明德掃欂櫨皇皇成文穆騎箕陟帝庭  
高門出材賢餘慶履後生公侯必復始亭亭為  
國植方當完胡者示夢未足驚樂天昔達者一  
杯病中傾柳枝與駱馬猶云未忘情朝雲化惠  
土拍板持唱經蘓公墨帖在遺戀尚牽縈况當  
正歡豫紅闈列傾城扶瑟高堂上雍雍鴛鴦鳴  
感夢開後閣雙壁出蕭屏非由澹情愛直緣雅  
量宏死妄竟勿藥盛德愈芬馨賢泚有良偶延



津還合弁依然崔與郭  
花燭對熒熒故素化新  
縑婉變有餘情至哉  
螽斯德抱衾宜小星  
願君夢國香願君夢  
若榮掌上弄明珠香  
閣貯金璫我任異夢  
篇非徒感夢靈建下  
如鵲巢裁詩志景行

述懷

貞玉有脆質幽蘭有弱枝  
黑白變蒼蠅翁舌恨南箕  
回腸日九轉慷慨多稟思  
直節聳雲日妖祲生虹霓  
嫦娥正盈盈桂影依然  
虧茹苦無我恤拊心徒自  
悲戢翼處籠中習習欲何  
之隨波來平千千里踞凌  
迤江頭舊行地回首暗  
歎噫契濶一相勞殊愧髻  
中然不羨壽城榮不愛千  
石資何如白屋子相對共  
哺糜人生重富貴所望亦  
有涯倘人相慶慰我心若  
有遺在水有清濁在山有  
高卑神理空倚伏世情多  
叅差欲叙平生意發言先  
自疑對鏡視容色時時歛  
雙眉徒抱朱絲直誰解別  
妍媸胷中百種念卷局無  
所施欲問仙人卜著龜久  
我欺朗誦苦相篇積



嘆不可支詩人咏禦窮非我今獨語人生貴適  
志富貴徒爾為回思生命薄當年值數竒歡娛  
轉眼間所歷更艱危俯仰三十載一心若朝饑  
何以遣惋憤托心黃梁祠乘鸞謁金母青裙拜  
玉墀元君為我友玉晨為我師孤吟志在此怨  
為他人嗤投筆作長篇襟前雨淚滋幽貞天所  
賦匪石心不移

和龍燈行韻

怒甲鮮鱗火光烈燬霧凝烟暗相逼左盤右感

攫復擎驤首高雲欲飛入初春潛蟄猶未驚陸  
地忽現真龍形三停九似眼未睹前擁明珠如  
巨星葉公所畏應若此宛曲燈前膩塵裏疑是  
龍門燒尾時却恐滿城翻海水團團皓魄不可  
攀貝闕珠宮波浪寒千金有技屠不得騰身祇  
恨龍坐窄蛟脂焮燭香氣氤氳電燄霞燦夜分明  
何人解學劉累術天邊常駕雙龍行

和百泉桃花

東風吹暖鶯聲逼苔長香堦履痕澁百泉游騎



漸成蹊驕驄赭汗連錢濕挿天竒峰空翠明晴  
霞一片桃花色坐對靈淵意自融隔溪遙見酒  
旗紅杖頭莫惜湏盡醉明日花前誰與同種花  
仙人在何處但願東皇常作主莫教鷓鴣促春  
歸坐使穠華委泥土

和市蟹行

古人嗜蟹良有以巨螯產自澄江吐霜清肉滿  
健如虎郭索纍纍走沙底北人空讀勸學篇八  
足二螯寧識此東行遠市真好事添符渾身鮮

可喜朱盤盛出瑩青銅啜醴哺糟醉中死魚餐  
邾莒誠小邦但甘斯味吾意止蘓門山前秋氣  
寒與爾違鄉共千里名公珍重著新詞一章三  
讀情何已持螯不惜更千盃吳羨偏重無腸子

平千署中作

閨閣山林十載強娛情活計一書囊每慚五斗  
折腰士愧殺千金買賦娘廣放胸襟容世態微  
開醉眼看興亡此來不為黃堂助欲破迷城繼  
子房



嘯雪齋詩集  
燕石紛紛辭自疑半生虛夢只心知晚薪已積  
馮誰問故劍空存未遇時卓女湯題溝水恨班  
姬曾賦玉階悲眼前正是無聲日何用文章達  
鄙私  
長養花枝眼看成好風吹動日盈盈逸時快意  
都非意到處含情豈是情懷感怕聞朝雉韻心  
孤每共夜烏驚世間萬事爭榮謝惟與愁人作  
不平

和春夕望西山一帶

憑虛西望巒岑嶽削出芙蓉秀莫禁懸澗潺湲  
飛瀑布歸禽點點沒芳林春含遠翠山光淺月  
吐寒波夜色侵知有真人採藥處偃松如蓋白  
雲深

早春喜雨

雲捲新寒漸向西  
琴聲添韻入前溪  
簾間日影珠猶濕  
樓上山光翠欲低  
莫惜梅稍香淡淡  
偏憐麥隴綠萋萋  
不知金埒誰盤馬  
紅錦連乾怕着泥



題畫

秋澗泠泠石齒齒森梢古榦搖鸞尾鮫人細繭  
曳輕烟幾節珊瑚生海底香根未得化靈槎客  
星遙隔天河水仙人拍板唱經時風聲一夜樓  
前起

乍晴天氣晚悠悠搖落偏教宋玉愁山冷最憐  
雲影淨水寒猶倚石根流茅亭低小霜天迴野  
迢荒涼露草稠風物坐令高興盡巾車回首更  
遲留

一縷茶烟小舍中數枚長石兩株楓午餘方啓  
柴扉看愛得溪邊落葉紅  
竹樹蕭蕭水滿塘野人偏得占仙鄉移花疊石  
無閒日不作塵中名利忙

題畫扇 藤花虞美人

錦帳覆紅姿紫花深綠地弱莠結愁腸露妝勻  
粉淚莫遣過江東恐負平生意山鬼女蘿衣輸  
君有名字

旅窓



閑倚闌干動旅吟人情相隔似飛沈鶴紳天宇  
烟霄濶燕戀春閨繡戶陰疇昔歡娛同逝水此  
時歌舞若為心愁峰常壓眉山重羈緒如絲不  
可尋

桑田白浪海波塵倚伏紛紛夢裡身鸞扇每思  
班女恨鹿車猶記少君貧二分明月揚州夜一  
縣繁花茂苑春顛顛較多歡較少斷腸最是對  
良辰

難將往事問玄穹此際悲歡自不同桂子香濃  
憐月墮棟花風急悵春空回腸轉處銀燈暗噩  
夢醒時粉淚紅羅帳四垂歌吹歇一生閑事到  
心中

七夕

鶴警烏飛相望時桂輪初發一邊枝銀河影落  
碧雲合琪樹寒生玉露滋光入針樓羅綺薄風  
當粉席管絃遲人間新巧年年變直恐天孫也  
不知

春閨曲



蜀雲金刻羅屏窄枕膩小山雕瑟瑟差差鴛尾  
日當簷玄衣雙睇珠簾隔風暖粧窓睡起遲殘  
夢無言心自知白馬花袍南陌上處處青樓柳  
似然樓前招手回金鞵一曲鸞歌碧雲響偏教  
春日閉空閨翠苔和露階前長

春晚曲

棟花風起春如醉海燕勞勞雲碎碎湖頭兩槩  
白晝閑莫愁深下珠簾睡筍生斑玉柳生綿陌  
上人歸草似烟轆轤聲促銀牀冷玉井飛紅隋

碧泉

畫家陸文祥偶過平干題此贈之

老翁遠過平干中雪髯金骨氣如虹機雲世曹  
有古風淡墨綉素誇神功樹石蕭灑插玄穹荆  
闕董巨堪爭雄十日一山能精工高堂冬月寒  
瞳濛白雲半束山腰斷天外青蒼落數峰石根  
老榦眼未識小山叢桂秦皇松霜鱗半脫衰文  
裂卷枝擘攫真虬龍回溪窈窕濺珠沫此間合  
得容梵宮烟嵐隱暎迷處所耳邊忽似聞晨鐘



老翁高逸謝塵事一生學佛悟真空偶然餘習  
存畫跡下筆不與凡夫同人生遊歷自有限惟  
有意正當無窮

和哀嫫娘四絕

王紫綬妾用原韻

羲和無賴促金鴉故使人間日易斜青帝匆匆  
歸碧落武陵溪水葬桃花

惆悵芳魂返帝鄉鴻都何處訪巫陽金釵鈿盒  
無由睹蔓草荒烟滿北邙

宋玉悲秋淚滿衣招魂可得有魂歸蘭香不向

人間住化作仙雲一片飛

百泉雲物暗模糊擬喚真真出畫圖應遣仙翁  
致魂魄水晶屏外見人無

秋景

點點羅窓外盪盪玉砌傍露滋香隄發日薄色  
偏光絡緯知秋早寒蛩怨夜長旅懷已自苦對  
此倍淒涼

邯鄲竹枝詞八首

東郊氣色曉來新車馬紛紛陌上塵盡喚曲中



歌舞妓羅中小繖去迎春  
風動簾波雪壓塵重裘二月未知春  
小娃學着羊皮襪笑出燈前踏舞茵

曲宴乘涼醉玉杯湖陂也有藕花開  
楊梅盧橘無因見祇喜中魚入饌來

合唱齊聲曲調揚優兒結束試登場  
南人失笑北人喜不似吳聲解斷腸

洛水迢迢似練來路人指點是叢臺  
亦似姑蘓歌舞處野烟無主亂花開

破臘風來月影涼上元良夜有燈光  
誰騎大馬衝塵過小婦當門學斷腸

吾家江外柳依依處處烟中好鳥啼  
爭似平干二三月長楸風雪亂鳥飛

小瓶刁酒徹杯清帶露葡萄似水精  
玉格銀盃宜醉客吳人無事愛吳羹

楊柳枝十首

聞道垂楊最有情路傍相見惜身輕  
白門一樹偏堪恨記得烏啼是五更



常與東風掃路塵嫩黃輕綠稱腰身滿溪桃李  
紛紛笑不信柔條絆得人  
小樹初開一抹眉武昌城下却移時春來到處  
烟條綠欲認何枝是舊枝  
寒食東風已滿城小枝纖弱挂啼鶯東君不惜  
離人苦又向前年折處生

雨滯風吹自趁嬌蜀岡烟撼碧搖搖隋家當日  
無端種直至如今恨未消  
點點輕綿惹繡衣手中承得又還飛狂花無主

青青老常對珠簾怨夕暉

葉葉含啼拂瓦溝三春相伴近朱樓阿誰金勒  
衝烟去却為青絲一轉頭

堤回水轉小橋通深鎖雕闌一曲紅依約美人  
曾立處萬條斜卷半邊風  
接影聯枝近水濱灣堤長日馬蹄塵好風來往  
東波逝常自迎春又送春

高低深淺各相宜誰解臨風揀好枝似舞似眠  
還似醉牆邊一樹最離披



和繡衣胡公哭送室人之作

子荆除服之篇安仁悼亡之句伉儷之  
重非直情愛之間而已也至于道路風  
霜奄然玉折旅櫬千里斯亦人生之極  
悲矣昔江文通有擬悼亡詩元微之傷  
悼詩白傅亦有荅和聊代其意和韻成

篇

河陽傷內顧秦嘉念嬰疾泛軍思高棲刀環歌  
遠出况茲生死間同衾情所恤良艾非難求遺

病年未七二豎在膏肓診之令心慄造次輪蹄  
下塵土方奔踣玉體犯風霜空念深閨遠鷓鴣  
摧幽蘭皇天苦相嫉平生靡室勞中饋煩拮据  
奄奄就長夜暖暖辭白日旅魂諒蕪蕪何當返  
故室莊生缶空鼓王尊馭徒叱去去從役子長  
途眎郵驛腹悲身自知神傷淚恒溢銀瓶墮玉  
甕輓轡挂新繡暗海如可尋誰知少君術

梅花賦

季冬之月浮雲矇矓日慘淡子難分于遠近風



凄戚予莫辨其雌雄俄而春回天冰陽生地中  
嶺梅先覺未上椒紅熹微早光輕含曉霜盈盈  
子縱玉拂拂予生香青陵之貞婦衣飄蝴蝶卓  
家之寡女裘裁鵲鷲皎皎予重染秦宮之粉盃  
盃子如登宋玉之墻冰封檀節珠迸苔痕寒生  
瘦骨夢鎖愁魂水側紛紛遙迷于曲渚籬邊點  
點遠認于烟村對流風而欲舞望彩月而將奔  
絕勝春蘭芬芳不絕何如穠李慙默無言乃有  
壽陽貴主妖妍自許矜紅粧之冉冉笑逐花生

映明鏡之團團人來月裏麝麝鱗圓滾肩翠嫵  
厭香鈿之拂額採瓊花于瑤圃乃為早梅之歌  
曰春禽已驚曉春信未全開高處雲猶冷陰根  
雪尚埋明晨應更好結伴試重来又為落梅之  
曲曰寄來憑越使辛苦犯紅塵不分簫中落空  
看髻裡新共愛梅花得春早先期飄瞥更愁人

蓮花賦 并序

余從宦廣武再閱春秋雲軒月檻衙署  
蕭然度日琴書而已遠城數里環列荷



花灼燥爛開署中有燕寢凝香閣高接  
 烟霄登臨一望清芬襲人可愛遂命採  
 擷高亞數十罇碧房茜萼盃盃滿室坐  
 周其間時見朶朶含愁帶笑如訕如譏  
 紛相錯聚可謂奇觀因而乘興丹青肖  
 之冰綃之上以記其勝蓋予所得於平  
 平者此紅香幾種也賦曰

拾翠羽兮洛水之神佩明月子藻濱之女遠舉  
 于雲中下臨于北渚目渺渺兮愁人魂迢迢兮

無處香纏蔓艸粉散餘霞亭亭脉脉化為蓮花  
 紛披翠蓋狎獵丹葩露泫而玉盤珠濺風來而  
 鈿扇雲遮亂荇連錢纖莖感粟鬢綴輕金根沈  
 脆玉平湖子十里橫塘子一曲芳生子白鷺齊  
 飛葉密子鴛鴦對浴繁英錦列縹絲星羅嬌房  
 全折似西施既醉駉駉而欲舞茁茁含姿如韓  
 娥微笑掩歛而將歌萍泛日而詎擬蒲綠水而空  
 多木蘭舟子日已暮深水曲子怨如何千葉分  
 敷並頭婀娜青絲繫處偏看水底雙紅桂檝迴



時更得洲邊一朶客有家居淺苑僑跡千千  
調笑鶴扇拂鳴鸞羨茲花之麗絕挿冰壺而玉  
寒懷鄉井以遙思寄丹青于弱翰重為歌曰吾  
家本在江南住季月迎秋江上涼女伴相隨採  
蓮去江水芙蓉映日光未須持作鏡自可集為  
裳木末應難得褰衣祇自傷試看波中紅澈底  
何如鏡裏見穠粧

梨花白燕賦

有靈禽于變玄質而被素衣愛庭花之皎皎穿

粉蓋之霏霏纖鈎欲墜輕雲乍歸風裏斜回拂  
湘簾而影疾宵來遙認映瓊砌而光微散玉鈿  
之千點逞纖腰之一圍藻主幃中照夜光於趙  
后蜀王帳裏玩積雪于甘妃李成蹊而詎比鶴  
舞市而還非一枝麋鹿臺邊爽光獨立並住鳳  
凰樓上弄玉雙飛藻珠燦爛洛袖依稀乃有瓊  
樹後庭桂梁蘭室乍裂霜綃初呈皓質霓裳前  
剪疑從釵上飛來麝月娟娟直是眉心捧出臨  
旭影而不消隱香叢而如失簷畔身輕枝頭香



密青禽欲到東方朔自許多知柳絮虛吟謝道韞應慙思拙安仁大谷蘭成小園年芳地勝日暖春暄睇雕甍而擘綠賀廣夏而翩翾豈比啖黃花而報德栖梓樹而含冤涅而不淄白非日浴值孫和水晶如意懶隨難求倚滿奮琉璃北窓蟾光空促脉脉盪盪森森藪藪惟皚皚之相依似余心之無欲

鄜州署中九日扶病登高

半載秦山依未畧秦山致恨彼二豎侵常負良

辰事今日云登高勉從時俗出扶筇試憑臨絕頂多竒企劈峰欲挿天飛瀑鳴如吹連拳古樹蒼環列屏嵐翠野叟負薪歸頑童乘犢戲靈禽逸座遙馴獸當巘睡四面烟霧深滿目秋光媚萬幅荆關圖齊懸于此丹青徒尔工欲寫殊不易大觀能爽神曠望開胸憤十里黃花香一行紅蘭醉參軍側帽來白衣挈壺至歡笑共持觥豈慮龍沙忌趙瑟引清商秦簫迴錦翅西風激塞笳明月寒光滌宛轉奏霓裳氤氳墮紅泪



問子一何悲佳節生鄉思故園樹樹秋浮名羈  
人遲青鏡霜華新黃塵馬頭漬遊子日勞勞試  
問何所為雨露被四方蘭臺尊獨位滄桑莫可  
期身世摠如寄黃梁枕上情蛇影盃中悸刻盜  
天地灰時變英雄異燕山桂子飄陶白銅陵棄  
萬里故人心百年驚電視猛歎日為伍操戈難  
自摯不如歸去來且適平生志節序黯然流聊  
以登高記

除夕感懷 庚子

辭家倏復三除夕千日愁城一病身心事暗流  
紅蠟淚椒花虛度紫毫春儻驅窮送懷難遣序  
代星遷恨不梭磨刻未終空浩歎抱冰勾踐志  
何伸

題清涼山萬佛殿

削成千仞石迴繞一川流飛閣擎雲出層臺面  
水稠烟嵐披古 老樹繞蒼虬空翠凝如滴晴  
霞爍不收鐘聲和澗落禪照隔林幽鷹鷂能明  
果人王重閻修施膏登寶座蛻殼証丹丘魚印



云何觸潮音般若求靈樓噓幻采野馬息浮漚  
羅綺江南士留題紀勝遊

辭富貴

竭予辭富貴富貴今何如謂言有夫僭朱轡擁  
隼旗藹藹東方騎冠蓋耀城隅歸來後堂裡方  
大巾中厨小婦挾朱絃貯貯動羅裾七十二鴛  
鴦顏色正敷愉歌吹恣朝暮春風秉燭娛厚祿  
豈不榮黃金非所須多謝羅與綺無煩飾我軀  
載拜謝青瑣何勞光我廬雖慙非明智助理或  
有餘要使千里境窮黎謳袴襦此志信落落亦  
自哂踈迂獨位人所羨銅陵誰復逾滄桑難固  
保灰劫類魚眾以茲却富貴懷舊發嗟吁靜中  
理琵琶起坐對詩書君不見金閨命嬪多薄命  
積薪憾後情如茶又不見布裘椎髻偏得意但  
使糟糠得飽還歡娛花誥燦朱紫適如裙布乎  
鼎食甘異味能知有鳩無愿子悟其理富貴誠  
剝霄决辭不足戀長嘯向蓬壺



奪盡樓中鳳蠟光  
尊前漏點莫嫌長  
鏡當秦殿  
偏寒膽玉剖荆山  
見截肪空處祇應容兔魄影  
中如欲見霓裳  
百年幾度當今夕  
歌舞相耳是  
夜涼

月夜

春生繡陌花盈路  
露洗長空月滿天  
碧樹錦香  
桃李徑  
画橈金錯木蘭舡  
窓前風動常含暈  
樓上霜寒幾度圓  
蟾影照來千點白  
桂叢生出一  
鈎偏陳王歌  
徹人千里  
陶令情多繡領邊  
涼魄最宜烟冉冉  
織綵惟稱蝶翩翩  
冰痕透影花枝冷  
小瓣沾衣月點媽  
染作素光疑粉色  
熏和香氣帶沉烟  
刀環消息經年在  
錦段功夫逐日鮮  
從此常為花下客也  
知人是月中仙

秋夜

向月一聲角  
關山無限愁腸隨塞  
馬斷淚逐洛波  
流鄉思三更夢  
孤懷萬籟秋霜  
刀侵肺腑欲遣  
若為謀

傷時



深于潮汐河利涉資舟楫危于羊腸板太行徒  
岌業世事最難期人心苦自憎長愁葉鎖眉巧  
笑花生靨愁笑不相謀欲言空喋喋蕭艾亂當  
墀椒蘭委餘篋蘭艾何足評春風任數抃不知  
蘭有芳祇惜艾能慙此理豈難明傷時太息歎

淡竹花

李頰疑傷白櫻唇恨太殷何如遠山色一點出  
枝間

壽王金章太史代四男作

長庚麗旭景元氣發靈光瑞靄迎黃閣春風碎  
玉堂赤霄神鶴隱碧海應龍藏化被天心洽聲  
垂宇內芳慈幃供戲彩翰苑晉封章玄圃芝方  
秀燕山桂漸香蟠桃開綺宴瑤瑟奏霓裳流雪  
飛瓊舞迎風葶縹緲翔唯嫌陶令拙不數謫仙狂  
奕世流馨遠多男種德長九如常受慶三壽共  
無疆海屋籌應滿年年進玉觴

題乾濠公署和壁間韻

步韻乾濠道花生昨夜風無鶯憐露蕊有雁泣



霜楓洛水聲應咽秦關夢合通風塵莫憚苦相  
護喜華桐

新安公署和鶴沙學士韻時將之蜀故有  
錦屏之句

春風繡輦入重闈滿縣桃花似避秦少水潺湲  
紅浪暖可容儂作問津人  
妖紅灼灼鳥關關日暖風香馬背閑回首三榆  
都噩夢豈堪復夢錦屏山

題画扇二首 夏景冬景

梅雨山顛潤松濤瀟氣清林鐘聲斷續不見咒  
龍熒

雲合天垂角遙山白鳳飛仙翁不吐火祇自釣  
魚婦

廊署驚雨不寐

黑雲四起騰雄風萬騎干戈驟碧空迸峽崩巒  
射帚開翻波激浪蛟螭攻驚魂迢迢宴不寐殘  
焰瑩瑩照欲窮簾外濤聲未宵息搜吟坐待五  
更終



題山水畫

春

風信幾番急  
閑中惜落花  
不知紅去處  
近晚一天霞

夏

一榻北窗下  
無愁愛日長  
莫嫌茆屋小  
竹樹有餘涼

秋

了却農家事  
柴門閉不開  
忽聞梧葉响  
鄰舍是

誰來

冬

朝旭南簷暖  
籬邊有老梅  
不驚殘雪盡  
且喜早春回

題百泉

太行迢迢繞天足  
疊嶺連峰似波盛  
蘓門突兀當衛源  
濃翠樓空青矗矗  
十頃清光蘋藻香  
湧金亭下鋪寒玉  
清濟徒伏流  
崑崙祇濫觴  
古人卓刀處  
耿耿秋鐵光  
水底圓珠吐  
細沫沙中疑



有蛟龍藏天河清淺應似此西走汾晉常湯湯  
我來二月春未濃落日和風好光景想見當初  
佩玉人巧笑曾經照清冷遠山曳輕雲近岫堆  
青螺可無美酒如春波此中遺跡堪憑吊荒臺  
古榭空陂陀朝歌邑號亦自好欲問迴車意若  
何

百泉襟題

嘯臺

魏晉已如夢荒臺今獨存龍蛇正交閉鷲鳳自  
高騫避俗惟長嘯逢人常不言始知真隱意不  
必入桃源

嵇中散

嵇公養生者龍性未能馴好畫知違俗多才却  
累身一絃空絕思長筵漫悲人惟有臨刑曲曾  
聞感鬼神

阮步兵

步兵善長嘯真隱恣幽尋慟哭途窮處誰能識  
此心高談遺物故越禮任胸襟莫話栖神術惟



當聽鳳音

安樂窩

堯夫昔論迹斯地寄簞馱杖屨無俗事名賢多  
素交山川猶藹藹桃李已蕭蕭擊壤留佳句風  
流亦自豪

春遊百泉

仲月春始和遠郊阡陌靜數里聞水聲豁然入  
靈境桃李猶含萼森肅長楸勁清漣映紅玉蘋  
藻明青鏡太行亘天末遙瞻似雲靚溯流尋神  
源圓折紛珠迸唯唯見魚樂鱗鬣自適性善病  
久無歡暫使心目澄至哉蘓門人今古誰與並

百泉游

靈源出山趾如練一川平空碧和烟冷微漣觸  
石生金搖日影碎珠散月光清衛女曾遊處猶  
餘佩玉聲

又春遊百泉

漠漠輕雲隱太行百泉春浪映垂楊真珠細轉  
寒沙靜素練平鋪碧苻香臺上鸞音思阮籍樓



中翠色憶汾陽 穠翠樓或言汾陽王所建樓前  
有碑水聲不絕游人去古廟觚稜起夕光

穠翠樓

高樓當勝地倒影入靈泉水色寒通晉山形勢  
接燕長楸風歷歷白鳥雪翩翩興矚良無已前  
峯又暮烟

已亥臈月赴任何西道宿淇驛戲寫淇門

暮景圖并步壁間韻

偶過淇門瞻彼流縱觀大地一雲舟紛紛車馬

正喧鬧其奈義和去不留

百泉寒眺次李水部韻

懷珠寒溜愛幽潺思托微波可待凝雲影冷侵  
孤鳥度穀紋輕鉞戲魚還碧連淇上園邊竹聲  
徹孫登嘯處烟曾卓寶刀龍氣在蕭蕭風色欲  
歸燕

桃莊醉歌

芳谿仲月東風起桃萼叅差綻深紫鳥轂濫曉  
喚遊人油鐸青驄盡紈綺仙村一閉不重開武



陵漁舟去復迴花莊霞爛紅滿眼此地亭臺亦  
壯哉水曹詩客厭凡俗花下尋春醉相續金樽  
在手詩百篇莫使尊前歡不足築槽為丘酒作  
池看花不飲應自嗤盈盈香靨似人面亂笑風  
前知為誰惆悵年年掃花帚靈桃千歲遙難偶  
不願神仙但須酒武皇緗核今何有

廣平春日閱操和韻

東郊向春春尚淺烟綠平原新草軟五馬驟驪  
校武行羅紉待中青錢選虎侯畫鷁紅如日猿  
臂彎弓滿如月甲光搖漾玉弦鳴鷗翎幼竹參  
差發鋪錢長埒桃花馬碧蹄翻風香汗赭畫角  
龍吟鼉鼓鳴旛鈴細柳相縈惹校功行賞士盡  
歡金烏倒影青疇寒驕驄啣勒嘶歸路風緊紅  
旂撼畫竿吾聞平千古趙國鼎士叢臺誇袷服  
遺風至今多探丸椎埋剽劫紛追逐西隣太行  
高突兀邃谷深巖狡兔窟曾喜渠魁能革心頗  
恨餘妖猶窈出不識軍營步伍齊遠屠鯨鯢服  
蛟螭漳滏安瀾太行寂常為帶厲護神畿



見黃梁遺跡悵然有和

擾擾紛紛一晌眠  
陵遷谷變劫灰燼  
儒家說夢都由想  
釋氏談空不逐緣  
曠去莫觀河伯水  
憂多虛論杞人天  
逍遙已解齊修短  
何事猶言有  
大年  
人間有夢不因眠  
萬事升沉盡偶然  
蛇入酒杯心是病  
花生空際眼為緣  
揮戈幾道能迴日  
書壁何勞更問天  
但使此中無一物  
不須物外覓  
長年

懷古

公子翩翩信絕倫  
擬將豪舉却狂秦  
不知賓客成何事  
枉殺樓前斬美人

七國紛紛苦力爭  
秦人曾畏黑龍形  
勢窮探穀英雄死  
留得高臺獨未傾

眷眷分香最有情  
當是遺恨滿西陵  
漳河還遶三臺去  
草木應聞按曲聲

黃河

曾是昔人沉玉處  
安流偏嘆禹勳多  
誰將海若



論秋水直到銀潢盡濁波陵谷幾遷常若此蛟龍得勢欲如何假饒徹底同清濟怒浪連山不易過

韓信城

乞食王孫困此中當時胯下辱英雄萬家淪滅丘墟改數尺陂陀雉堞空兵出陳倉絲逐鹿勢窮雲夢倏箴弓將軍不解謀身策鐘室徒勞憶蒯通

送公采姪下第南歸

凍雲皚皚漲空白風暗黃塵吹古陌臨岐把酒送行人可憐毳毼江頭客莫憶長安春滿野此中誰是知君者燕臺市駿湯堆金驪黃滿眼空凡馬荆山夜夜氣如虹連城欲剖期良工吳干在土埋切玉會須一日乘雷風幽蘭谷裏冝題品善種終當遇豐稔休辭豹霧養文章多剪丘遲夢中錦

紅白梅花翠鳥題成仝菴太史扇

玉妃臺畔醉秦女鏡前妝豔雪迎寒魄朝霞捧



太陽神膏痕獺髓靈藥擣胡香翠羽來何處啣  
春過宋墻

題朱藤窈美人画扇 郭石公

巫女曾聞化玉芝楚歌偏詠薛羅帷爭知弱夢  
牽愁處正是天紅欲舞時蜀錦風吹春色暎鮫  
綃露濕曉光遲帳中一曲江東遠步障空教設  
紫絲

題真定胡司理虞美人画扇 吳春洲 理也  
曾聽雜鳴起帳中佳人埋沒霸圖空却留怨魄  
頻頻舞猶帶殘妝點點紅一片丹誠迎白日幾  
叢幽恨怯春風江東何限纖腰客誰把芳名在  
楚宮

題秋景畫扇 大名佟郡伯

黯黯羅窓外盈盈玉砌傍露滋香徒發日薄色  
偏光促織知秋早寒蛩怨夜長旅懷已自苦對  
此更淒涼

題芙蓉畫扇

淡日西風秋半時野塘紅冷一枝歌融融醉態



偏生媚靨靨嬌憨更覺冝烟柳能眠饒作伴天  
香解語是相知鶴鴿何事頻搖尾應惜分原欲  
去遲

已亥歲朝

春和雪絮到天涯粧點池臺瑞氣加藍尾尚堪  
傾竹葉紅顏爭學頌椒花東風漸轉銀瓶小曉  
色餘寒翠幙遮人羨今朝新景好我憐去故獨  
興嗟

九日登高

見插茱萸黯自傷憑高悵望涕沾裳秦山空逐  
哀猿嘯南國難同去鴈翔落帽有風誰共醉白  
衣無酒慙愁腸紅蘭憔悴黃花瘦百感悽心賦  
短章

時當素交盡利交興偶發一嘆

雪白蘭薰非謂潔重淵珠玉豈為珍誰教貼纈  
探殘息自愛量金解買春總是蒼蠅能點白可  
憐素扇欲生塵妍蚩同夢何時醒獨嘯悲歌愴  
鬼神



遙吊胡夫人

別鶴聲孤恹素琴仙山飄渺悵難尋楚臺夢覺  
雲還散弱水波深月自沉蕙帳香銷潘岳筆鮫  
綃露冷女嬃砧可憐千里同為客遙吊湘靈淚  
滿襟

巫咸不下莫招魂鸞影塵生寶鑑昏草綠長途  
空寄恨花飄露井已無言荆山璞碎心堪折幽  
谷蘭摧淚暗吞惆悵臨風不成寢宵征愁殺楚  
王孫

賀姪孫女出閣

盤龍清照一枝蓮十二釵行鳳影聯宗女世家  
真婉婉上才華曹正翩翩金堂寶殿高輝燭繡  
戶香風拂管絃喜氣旺人過瑞露秦樓此日會  
神仙

賞海棠即席和韻

金谷名花開阿嬌樽前歡賞逞風標半酣半睡  
渾無力低鞞偏憐學步搖

端節病鄉感懷



病魔久滯忘時序忽聽憐姬喚浴蘭強把花枝  
腸暗斷低遮紈扇泪偷彈良辰只繼沉湘恨佳  
節何緣菽水歡惟有榴花如解意媽紅片片帶  
脂殘

雪窓

庾子小春郵署作

東秦小春春無力朔風吹雁寒淅淅衡陽孤鶴  
歛翅飛雲重邊城馬無跡玉肌粟起曉羅輕片  
片吹來大如席天涯羈客涕沾巾遊子斷魂歸  
路馬紅閨寂寂麝煙銷蘭帷夢冷衾如鏡粧臺

脂凍蓮膏亞京兆弗凝眉不寫冰繒裂盡亂巾  
飄叅差六出迷篤瓦何處丹山白鳳翎時見飛  
瓊駕鸞下當年懽和謝家詩此日孤吟淚暗灑  
莫恨膏肓易著魔難填銀海多牽惹捲簾別是  
一番新水晶樓閣玻璃野青帘許酒阿誰家驢  
驢裘薄文君寡千金沽酒戰凝寒嚼雪咀風傾  
玉笋小窓一醉梨花春

時洛川縣官送梨

不羨

并州得玉馬

題秋景畫



溽暑初收白露橫長空明淨早涼生塘邊日照  
秋容醉原上風清好鳥鳴譜入丹青供韻賞題  
鮮佳句柰關情幽光程待安仁賦未許多愁宋  
玉驚

賀孫氏兩表於同日合歡

黼帳週遮畫燭燒玉堂佳氣藹良宵聯輝棗葦  
看雙陸並茂仙葩駕二姚魚貫乘龍交錦帶雁  
行騎鳳合瓊簫只應玄象明河畔牛女珠光射  
斗杓





